



# Antamantaraq kanchik

Alejandro Enrique Numbela Rodríguez

Kay yachaywasimaqa, mana jinachu suyu yachaywasipi kachkaptiyqa karqa. Mana ancha atiqpunichu kaq kani, jinapis mana pipis awrichiwaqchu. Chay kulijupiqqa, ima ch'ampaypi rikukuspaqa, supaynillaykita jurqhuchikunayki kaq, kunari kaykunaqa mana qhawarina kasqanku. Matisitu allillan, chay Riwirturi, kayjina jallp'araw kasqaymanta manchayta awrichiwan. Chay juk p'unchaw, "C" kaqkunawan pukllakuchkaptin, k'usillujina pukllarawanku. Sapa ratu millay saqra sutinkuwan ch'aqwamunku: Cabrón, Batón, Nigga, Indio chayri Animal, ñispa. Qanimp'unchaw ch'inypachiyta munarqani, jinch'arpanapaqña kachkaptiytaq watiqaq rikurpawan. Chaychu mana yawra! Chayllamanta umalliq minchhapaq mamayta waqyachin, amalla wikch'uwan kumanchu.



Tukukunña chay tantakuy. Chay umalliq ajina q'iwa kasqanta mana yuyarqanichu. Chay wawqikuna tukuy ruwawasqankuta ñipuni: "allquchawanku, thuqaykuwanku, qhichurawanku", jinapis mana uyariwanchu. Riwirtup tiyun SEDUCApi llamk'an, chanta mana kasurikunchu, ima llullawanpis llusqirpallanku. Kay umalliq ñawpa umalliqqa mana atisqanrayku llusqisipusqanta ñiwarqayku; jinapis pay mana punkunta yaykusqanta tukuy yachayku. Qhasi imatapis ñisqayku, astawanpis mamayaraq paqtaran, pulliranta millaywan qhawaspa: "wawaykichus kay yachaywasipi jukllatawan pantanqa chayqa, yanapanta qhichusaqku, wikch'usaqku, ñuqa kikiytaq mana mayqin yachaywasiman yaykunanta qhawasaq", ñispa chay allquqa qhapharin. Mamaychus mana waqanmanchu karqaqa, kunkanmanta q'allpiyman karqa. Jina mamayta sunquchaspa llusqinpuyku.

Kunan paqarin chay Mochila Seguramanta jamunku. Wasiy chay chayta purimunanakutaqa, chay runa wanchinakun chay chayta, chay qhillakunaqa kayllapi icha kuchilluta, rawuta chayri kuka pituta jap'ichkasqaykuta mask'aspa kachkanku. Phiña makipis kaykumanjinata qhawawayku. Ñuqajina yana runitakunataqa ch'unchulaykukama yaqha qhawawayku. Lluqchiykuyllaña mana llusqiykuwaykuchu, mana imata taripanankupaq. Uuuta, chay yuraq qaritakunatari, ni silularnillankutapis mañankuchu, wayaqallankuta purinjina qhawarparinku.

Yachachikunaqa, manapis tukuyninkuchu, munakuwankuraq. As yuyayniyuqlla karini, chantachá. Samariykunapi maqanayawaptinku qhawaq titipacha sayan. Kutichikunayaptiytaq chaypipacha rikhurin. Umalliqpis qhawaykachawaspallapuni purichkan, mana rikuchman tukun. Jinapis, atichaw p'unchawtaqa manapunuwantaraqkunichu. Mana uyariq ruwakuchkarqani, chayta ripararqukunku. Chantaga astawan mana kaq simikunata ñiwaq kanku. Jinallapi chay Llanos, "mamayki millay warmi", ñiwasqanta uyarikuni. Qhawaq qhawamuchkarqa, chaypis imapis, k'ispiñakuspa jukllata saqmapuni, mana jayk'aq qunqakunanpaq.

Traducción: Juan Revollo Valencia

